

Dörfleigschter 2005

Hai-ho-hai-ho-hai-ho, mir sy aus Schwyzer Zwärgli do,
Wüü viele Lüt hei Fröid a üsem Schwyzer-Chrüz bercho,
S' git Chuguschryber, Täschli, BH mit rote Mäschi,
Halstuech, Schirm u Tschäppu, Grawatte für e Päppu,
Schiissidechu, Tanga-Slip, Finke, Socke, Handy,
Überall gsehsch wyssi Chrütz, äs nimmt jo gar kes Ändi,
Das wysse Chrütz uf rotem Grund isch ä grosse Rysser,
Was jetz no fäuhet, das isch e Schwyzer Chrützli-Pariser !

Der Blocher chunnt uf Biel, äs git es grosses Gschrei,
Die Lingge und die Nätte ihn nid im Volkshuus wei,
Drum wird demonstriert i de Bieler Gasse,
Mit sym brune Mänteli tüeng är nid häre passe,
Mir meine, lööt da Schnurri dört si Seich verzapfe,
Vielleicht tuet ne jo der roti Geischt vom Volkshuus packe !

Als Outofahrer darfsch jetz nümme güügele u süüffle,
Süsch tüe sech d' Buesse u d' Aazeige plötzlech afo hüüffle,
Eis Glas isch gnue, tüe si überall jetzt säge,
Mir mache dänk do mit, das macht üs nid verläge,
U tüe euch jetz verzeue, wie das bi üs tuet loufe:
Mir gö ganz eifach alli grösseri Gläser go choufe !

La radio Canal 3 est maintenant à la trappe,
Et va être bouffée par des étrangers, ça nous frappe,
Pour die wätsche Biennois, ça fait mal au coeur,
Bärner Gringe à la tête, on a vraiment peur,
Ils savent même pas parler es bitzeli français,
Avec ces têtes carrées Bernoises ça marchera jamais !

Das nöie Bieler Parkplatzleitsyschtem das tuet di länke,
Jetz muesch bym Parkplatz sueche - dasch super ! - gar nüm dänke,
Mir tüe jetz nume bäte, äs tüeng ou funktioniere,
So dass bim Sueche nümme d' Närve muesch verliere,
U der Housi tuet dänk hoffe, äs wärdi ändlech glinge,
Dass d' Outofahrer jetze ds lääre Bahnhof-Parking finge !

Das Biud, wo Dir do gseht, das tuet üs e chly weh,
S' isch e kei Gmüesacker vom obere Bielersee,
Auso kei Buur bym Pflüege für syni Zuckerrüebe,
Nei, äs isch e Gruus, so gseht d' Gurzele gly us,
Üsi Sportalaage z' Biel si nümme grad für viü,
U de mache si äs Gschyss u berchöme no der Wakker Prys !

Jede Morge geit d' Frou Pfund go spaziere mit em Hund,
U luegt, dass ihres Hündli ou gäng macht sys Pfündli,
De begägned ihre d' Frou Näser mit ihrem grosse Schäfer,
U spöter no d' Frou Styner mit em Bärnhardiner,
Die müesse jetz dra dänke, wo si ihre Liebscht' härelänke,
Süsch chönnt der Housi Chlag yreiche - wenn si anes Stöckli seiche !

Üsi SBB die sy jetz ganz modärn,
Denn die Bahn 2000 verbindet Nah und Färn,
Und als nöischte Gag, wett sy jetz scho probiere,
Als Billet-Ersatz ds Handy chönne yzführe,
Das cha nid funktioniere, äs isch jo grad zum lache,
Wie söu dä Kondukteur äs Loch i ds Handy chönne mache ?